

Influenza A

Sekolah dibenar tutup jika wabak makin serius

Pengetua, guru besar perlu rujuk pegawai kesihatan, jabatan pendidikan

Oleh Mohamed Farid Noh
bhnews@bh.com.my

Johor Bahru: Pentadbiran sekolah dibenarkan menutup sekolah masing-masing jika wabak Influenza A semakin serius dan menular menjangkiti ramai murid mereka.

Kuasa kepada pengetua dan guru besar untuk mengambil tindakan berkenaan bagaimanapun tertakluk kepada prosedur tertentu yang turut membabitkan pihak berkuasa kesihatan serta jabatan pendidikan.

Timbalan Menteri Pendidikan, Teo Nie Ching, berkata pentadbiran sekolah mesti mendapat nasihat pegawai kesihatan daerah yang memantau penularan penyakit itu, selain merujuk kepada jabatan pendidikan negeri masing-masing.

"Tempoh penutupan pula atas nasihat pejabat kesihatan daerah, manakala murid yang dijangkiti diberi cuti sakit bergantung kepada tahap keseriusan penyakit. Langkah menutup sekolah atau kelas jika diambil, antara lain adalah juga untuk kerja pembersihan bagi mengawal wabak daripada merebak," katanya.

Beliau yang memaklumkan demikian kepada *BH*, turut menjelaskan bahawa tindakan menutup sekolah atau kelas perlu diambil bagi memastikan tiada murid, pelajar, guru mahu pun kakitangan sekolah terjejas dengan wabak berkenaan.

Terdahulu pada sidang media selepas merasmikan majlis penyerahan bantuan persekolahan SWM Environment Sdn Bhd kepada murid dari keluarga berpendapatan 40 peratus terendah (B40) di Kulai, Nie Ching berkata, belum ada sekolah dinasihatkan ditutup akibat Influenza A setakat ini.

Beliau yang juga Ahli Parlimen Kulai berkata, Kementerian Pendidikan bekerjasama erat dengan Kementerian Kesihatan dalam isu penularan wabak itu di sekolah, termasuk mengambil tindakan menutup sementara sekolah atau kelas sekiranya perlu.

"Setakat ini, kita belum menerima nasihat daripada Kementerian Kesihatan untuk menutup mana-mana sekolah walaupun ada murid di Pulau Pinang dan Pahang disahkan dijangkiti virus Influenza A.

"Setakat ini, hanya dua kelas

Influenza

Simptom lain seperti sakit kepala, otot, sendi dan kelesuan

Gejala utama seperti demam, selesema, sakit tekak, batuk

Menyebabkan demam selesema ringan kepada orang biasa

Jangkitan disebabkan virus Influenza bermusim

Boleh alibatkan jangkitan teruk terhadap kumpulan berisiko tinggi seperti

- warga tua
- wanita hamil
- kanak-kanak
- berpenyakit kronik

Jenis-jenis Influenza

3 jenis virus Influenza, A, B dan C

Jenis A, B paling kerap jangkiti manusia, berlaku sepanjang tahun di negara tropikal seperti Malaysia

Jenis A (H1N1) boleh jangkiti manusia dan haiwan, epidemik sangat teruk dan amat berbahaya

Virus B hanya ditemui dalam kalangan manusia, jangkitan mungkin lebih ringan berbanding virus A, namun masih berpotensi menyebabkan penyakit, simptom teruk

Virus C menyebabkan penyakit paling ringan, kadangkala orang dijangkiti tidak menunjukkan sebarang tanda atau simptom

dan pentadbiran sekolah lebih prihatin jika murid sekolah mereka mengalami simptom Influenza A.

"Nasihatkan mereka tidak perlu ke sekolah, tetapi berehat di rumah dan dapatkan rawatan segera," katanya.

Di Kuala Selangor, Menteri Kesihatan, Datuk Seri Dr Dzulkefly Ahmad, ketika ditemui media memaklumkan kementerian sudah mengarahkan pegawai kesihatan daerah memantau ke-

adaan di sekolah yang muridnya dikesan dijangkiti Influenza.

Kementerian juga, katanya, mengingatkan pihak sekolah supaya sentiasa membuat pemantauan berhubung jangkitan wabak itu sebagai langkah memastikan kesihatan murid sentiasa terjamin.

"Kita turut mengingatkan supaya pihak sekolah mengambil langkah sepatutnya supaya penularan wabak terbabit dapat dibendung," katanya selepas me-

nyampaikan sumbangan barang keperluan asas kepada 170 warga emas sempena sambutan Tahun Baharu Cina, semalam.

Mengesahkan jangkitan Influenza A yang dikesan di beberapa sekolah, termasuk di Selangor masih terkawal dan tiada arahan penutupan sekolah setakat ini, Dr Dzulkefly menasihatkan masyarakat agar tidak khuatir kerana bekalan ubat-ubatan untuk merawat, termasuk di klinik swasta mencukupi.